

Fobitro Injil Shorif 18 nombor sifara al-Filimon Forisiti

Alla Pakor hukume Hozrot Isa al-Mosir kas sahabi Hozrot Pauluse (ra:) ou sifara leksoin. Hozrot Isae behesto toshrif neoar onuman 27 bosor bade ikan sitir akare leka oise.

Hozrot Filimon asla Isa al-Mosir ekzon namqora ummot. Tain Kolosi taunor Isaei zomator ek zon. Onisim name tan ek qorida gulam asil. Hozrot Paulus (ra:) zebila zelo bondi asla, ou shomoe Onisim tar munib Filimonor ges taki bagia kunu surote Paulusor gese aisil. Hozrot Paulusor mazdia-u Onisim Isaei imandar hishabe Paulusor ekzon bishesh kadim oisoin. Tara duiozone foramish qorla, Onisim tan munib Filimonor gese firia zaiba, ar tan agor bul shikar qoria maf saiba. Hozrot Pauluse Filimonor gese onurud qori lekla, tain zanu tan agor gulamre firof nein ar okon qali gulam hishabe nae, ekzon Isaei bai hishabe-o shomzia nein.

Ou sifarat deqa zae, gulam ar munibor maze kunu bedabed nai, Hozrot Isar ummot oar bade hoqolu ek shoman. Ar zomator murobbi neta Hozrot Pauluse shadaron mumin okolor ufre netagiri, hukumdari na qoria borong nizore nisa qoria zomat okol salaira. Tan maze kunu betagiri ba borai-bahaduri nai.

Ermaze ase,

- (1) Hozrot Paulusor salam 1:1-3 *aeat*
- (2) Hozrot Pauluse Filimonor tarif qorla 1:4-7

(3) Onisimre frot neoar lagi onurud 1:8-21

(4) Hozrot Paulusor shesh kota 1:22-25

Hozrot Paulusor salam

¹ Ami Paulus, Isa al-Mosir lagi bondi asi. Ami ar amrar bai Timotie, amrar logor toblig korra maear dust Filimonor gese lekram.

² Boin Afia, amrar loge imanor zudda Arkipas ar tumar barir zomator hoqolre salam zanairam.

³ Amrar gaibi baf Alla Pake ar Hozrot Isa al-Mosie tumrar ufre rohomot ar shanti nazil qoroukka.

Hozrot Pauluse Filimonor tarif qorla

⁴ Ami hamesha munazator shomoe tumar kota iad qoria Allar shukria adae qori.

⁵ Karon Hozrot Isa al-Mosir ufre tumar iman ar pak bonda oqolor bae tumar mohobbotor kota ami hunchi.

⁶ Ami dua qori, mumin oqolor loge tumar qatir-shomporko aro barouk. Tumi to zano, al-Mosir qatire Allae amrare qoto bala bala niamot bilai disoin.

⁷ Bai, tumar mohobbot dekia ami kub kushi oisi ar utshaho faisii, tumi to Allar pak bonda oqolor dilo aram diso.

Onisimre frot neoar lagi onurud

⁸ Tumar i bab dekia ami tumare ekan kota koitam sairam. Ami to al-Mosir name tumare hukum ditam farlam one, tumar kam fura qorar lagi.

⁹ Oile mohobbotor qatire hukum na dia tumare minot qoriar. Ami Paulus ou murobbi

boeosho al-Mosir lagi bondi halote tumar gese i minoti korram.

¹⁰ Amar aolad Onisimor lagi arzi zanairam, ami zelo bondi taqa halote he iman ania amar aolad bonigese.

¹¹ Ek shomoe tumar gese he beqama asil, oile okon amar ar tumar gese he bout qamaora bonigese.

¹² Zai ouk, amar zanor taki beshi maear ou manshore ami tumar gese firot faqairam.

¹³ Ami tare amar gese raqtam saislam, zate kush-qobrir dae bondi halote tumar oia he amar kezmot korto fare.

¹⁴ Oile tumar izazot sara ami kunta qorlam na, zate zur qoria tumar bala qam adae qora na lage. Ami sairam, tumi niz takiu ou qam qoro.

¹⁵ Tumi zate siroqalor lagi tare firia fao, oito fare ou qaroneu he tumar ges taki tuqa dinor lagi horia asil.

¹⁶ Oile tumi okon tare ar gulam hishabe faitae nae borong gulam taki boqo, mani maear bai hishabe faibae. Qas qori he amar kub maear manush, okon tumar geseo he aro maear, qali roqto-mangshe nae, imandar bai hishabe maear.

¹⁷ Erdae tumi zudi amare ekoi imanor bagi zano, te amare zela qobul qarar qota, tare-o ola qobul qorio.

¹⁸ He zudi tumar kunu qeti qoria taqe ar tar gese tumar kunu faona taqe, te mono qorio, i faona tumi amar gese fao.

¹⁹ Ami Pauluse nizor ate lekia zanairam, tumar faona ami dilaimu. Ashole ami qoitam sairam na

ze, tumar nazor zanor lagi-u tumi amar gese rini aso.

²⁰ Bai Filimon, Allar oaste ekan kam qoro, ekzon imandar bai hishabe amar zano aram deo.

²¹ Tumi amar qota rakbae zania-u, tumar gese ou sitikan leklam. Ami mono qori, ami zeta qorar lagi qoiram, er taki beshi tumi qorbae.

Hozrot Paulusor shesh qota

²² Huno, aro ekan qota qoiram, tumi amar lagi memanor kuqa tik koria rakio. Qaron ami asha qorram, tumrar duar usillae amare tumrar gese firot deoa oibo.

²³ Abu-Farase tumare salam disoin, tain Isa al-Mosir lagi amar loge oia bondi asoin.

²⁴ Ar amar logor tobligkari Markus, Aristakus, Dimas ar Luke-o tumare salam zanaira.

²⁵ Amrar Hozrot Isa al-Mosir rohomot tumrar dilo qaim rouk. Amin.

Sylheti New Testament (Latin)
Sylheti: Sylheti New Testament (Latin) New
Testament+

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

2eb27397-6d35-5c13-b811-aecd7920507c